



Savjetodavna služba u biljnoj proizvodnji

Biotehnički fakultet - Trg Kralja Nikole bb, 81000 Podgorica

Tel: 020 206 713 Fax: 020 206 712

E-mail: extension-pg@t-com.me

KREČENJE VOĆAKA

Mnogi ne znaju zašto se debla voćaka premazuju krečom. Neupućeni misle da se radi o uljepšavanju, pa tako debla premazuju tek u proljeće. Ali pravo vrijeme za krečenje voćke je upravo sada, u jesen. Debla voćaka premazujemo kako bismo spriječili naglo zagrijavanje pod uticajem sunčevih zraka. Naime, nakon niskih temperatura, koje uz tlo znaju biti i nekoliko stepeni niže nego u meteoroškoj kućici, jutrnji zraci naglo zagrijavaju deblo. Ova pojava je češća tokom hladnih noći i toplih zimskih dana kada se kora zagrijava dvojako i to direktnim sunčevim zračenjem i refleksijom od snijega na tlu od kojeg se sunčeva svjetlost odbija i pogađa stablo/koru voćke.

Zagrijavanjem debla dolazi do širenja dubljih djelova tkiva, koje ne prati širenje kore te ono puca. Ovu pojavu nazivamo **mrazopuc**. Na mjestima gdje se kora raspukla naseljavaju se uzročnici truljenja i takve rane teško zacjeljuju. Kako bismo spriječili pojavu mrazopuca, debla i račve grana treba premazati smjesom svijetle boje po receptu:

5 kg negašenog kreča
0,25kg kvašljivog sumpora
0,5kg kuhinjske soli i voda

Kreč se prvo zagasi i odstoji nekoliko dana pa se onda dodaju drugi sastojci. Sastojke je potrebno dobro izmiješati i dodati toliko vode da se dobije žitka smjesa koja se može nanositi četkom. Prije premazivanja dobro je da smjesa odstoji 24 sata kako bi bolje prijanjala na koru. Kvašljivi sumpor uništava štetne gljivice na kori i odbija štetočine, a so daje bolju ljepljivost smjese. Debla voćaka premazati od zemlje pa sve do iznad račvišta grana 30-40cm. Naime, mjesto gdje grane izlaze iz debla naročito je osjetljivo na mrazopuc. Najbolje vrijeme za krečenje voćaka je pred samu zimu kraj novembra početak decembra, tako da voćke budu okrečene prije nižih temperatura. Pravilo je da se krečenje obavlja po lijepom i suvom vremenu na tem. iznad 0°C, u protivnom, krečna opna bi se smrznula i odmah odvojila od drveta, odnosno kore i stabla.

Kajsije, šljive i trešnje su posebno osjetljive na pucanje kore pa ukoliko se ne okreče značajno se smanjuju šanse da opstanu duži niz godina. Ukoliko na deblima primijetite pojavu pucanja kore, takve rane treba dobro očistiti od trule kore sve do



zdravog tkiva i zatim premazati gustim rastvorom modre galice. Naknadno premazivanje voćarskim voskom pomoći će zarašćivanju.

Zahvaljujući sumporu i kreču ova mješavina ima **dezinfekciono dejstvo** jer čisti deblo od gljivica i lišaja. Krečenja takodje može da utiče na **odlaganje kretanja vegetacije** za nekoliko dana, što u našim uslovima može da bude dosta značajno.

dipl.ing Mileva Marić

Savjetodavna služba Herceg Novi

